



Broj: 01/1-02-2080/17
Breza, 28.08.2017. godine

Z A P I S N I K

sa OSME REDOVNE SJEDNICE Općinskog vijeća održane dana 26.07.2017. godine sa početkom u 16,30 sati u prostorijama Općine Breza-Sala Općinskog vijeća.

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 20 vijećnika. Vijećnica Amina Jekalović je najavila kašnjenje.

Osim vijećnika sjednici Općinskog vijeća su prisustvovali: Općinski načelnik Munib Zaimović, pomoćnici Općinskog načelnika: Meliha Beširević, Smajila Omerhodžić, Salih Hasanspahić, Herco Huso, savjetnici općinskog načelnika Mustafić Eldin i Džambić Mirza, predstavnik Ipsa instituta, predsjednik i članovi Odbora za provedbu Etičkog kodeksa, predstavnici političkih partija SDP i SDA i predstavnici medija.

Predsjedavajući Općinskog vijeća Jusić Vedad upoznao je vijećnike da su održane dvije sjednice predsjednika klubova parlamentarnih stranaka, te da su zapisnik o istim dobili u materijalima, a dostavljeno je mišljenje Komisije za Statut i propise.

Zatim se pristupilo razmatranju i usvajanju Zapisnika sa sedme redovne sjednice Općinskog vijeća Breza.

Primjedbu na Zapisnik dao je vijećnik Avdić Edin, koji je zatražio da se u zapisniku na trećoj strani kod dijela gdje je pokrenuo inicijativu ispravi sljedeće „Da poslovnice banaka sa područja Općine Breza u mjesecu promocije posjete brezanske škole, vrtić i biblioteku i da doniraju određena materijalno-finansijska sredstva jer imaju moralnu obavezu u odnosu na građane Općine Breza. Također poziva menadžment firmi Telemah i Telekom, kao i ostale uspješne kompanije da se u mjesecu promocije uključe i doniraju materijalno- finansijska sredstva koja su potrebna za normalan rad javnih ustanova“.

Također je istakao da je on postavio pitanje: Kome će građani općine prijaviti pojavu zmija na području općine i ko je nadležan za sanaciju terena? A, ne pitanje: „šta je poduzeto povodom najezde zmija?“.

Vijećnik Bajrić Fetah u okviru rasprave po zapisniku postavio je pitanje: zašto na sastanku predsjednika klubova u dnevni red nije uvrštena i tačka dnevnog reda Izvještaj o izvršavanju Budžeta Općine Breza za 2017. godinu kvartalno (tromjesečni izvještaj) juli 2017. godine kako je usvojenu u Programu rada Općinskog vijeća za 2017 godinu te zašto ne poštujemo vlastite usvojene odluke?

Pomoćnik Općinskog načelnika Meliha Beširević objašnjava da je služba dužna Izvještaj o izvršavanju Budžeta dostaviti ministarstvu finansija do 20.07.2017. godine, te nakon dostavljanja mišljenja od strane ministarstva finansija, priprema se Izvještaj za Općinsko vijeće koji pored tabelarnog dijela zahtijeva i tekstualno obrazloženje, te iz proceduralnih razloga izvještaj se nije mogao dostaviti do kraja mjeseca jula, te da ubuduće ovaj izvještaj treba planirati za kraj mjeseca augustu tekuće godine.

Vijećnik Bajrić Fetah ističe da je poenta u nepoštivanju usvojenih odluka Općinskog vijeća, koje smo sami usvojili.

Primjedbi na Zapisnik više nije bilo, te je nakon provedenog postupka glasanja konstatovano da je isti usvojen sa datim primjedbama jednoglasno sa 20 glasova ZA, bez protiv i suzdržanih glasova.

Potom se prešlo na odgovore po vijećničkim pitanjima.

Vijećnik Avdić Edin istakao je da nije zadovoljan odgovorom Općinskog pravobranioca koji se odnosi na pravila i procedure kada Općinsko vijeće ne prihvati izvještaj o radu javnih ustanova čiji je osnivač općina. Očekivao je da Općinski pravobranilac bude autoritet istine kada su u pitanju pravila i procedure i da bude zaštitnik društvenog i javnog dobra, te da bar malo dođe do depolitizacije u radu javnih ustanova i javnih preduzeća. Ukoliko upravni odbor ne provede pravne procedure, ko je taj ispred osnivača da to uradi.

Vijećnik Arif Sirotanović ponovo insistira na provedbi Odluke o javnom redu i miru, te da li je ista dostavljena Policijskoj stanici Breza radi primjene.

Safet Zahirović ispred Stručne službe Općinskog vijeća pojasnio da je po pitanju primjene Odluke o javnom redu i miru izvršena ispravka tehničke greške, te da je Komisija za Statut i propise uradila prečišćeni tekst odluke, te jedan primjerak dostavila i Policijskoj stanici Breza.

Zatim se prešlo na postavljanje novih vijećničkih pitanja.

Vijećnik Salčinović Fikret postavio je vijećničko pitanje koje se odnosi na vodovod Mahmutović Rijeku, šta je razlog čestog mučenja vode u periodu kada je veoma malo padavina, te da li je to posljedica nekih aktivnosti u vodozaštitnoj zoni ovog vodozahvata. (Radu vijeća priključio se vijećnik Bajrić Fetah u 17,15 sati.)

Vijećnik Arif Sirotanović ponovo pokreće inicijativu oko popravke rasvjete u ulici Stara kula i kod započetog spomenika šehidima i palim borcima u Brezi.

Vijećnica Selma Beširević postavila je pitanje: hoće li put u ulici S.Bešlagića u Brezi biti popravljen poslije radova na ucjevljenju potoka u istoj ulici i postavljanju ulične rasvjete?

Vijećnik Buljetović Čamil zahvalio se organizatorima na uspješnoj organizaciji „Šehidskog trunira“ u Župči. Također, podsjetio, da je ove godine desetogodišnjica blokade računa F.K Rudar, te pita ko je kriv za ovakav položaj ovog brezanskog kluba. Postavio je pitanje ko je i na koji način donirao dresove igračima Mladosti iz Župče, a da igrači Rudara nisu dobili donaciju, da li je donacija došla od rudara ili od direktora rudnika?

Vijećnik Bašić Mirnes postavio je pitanje o mogućnosti postavljanja više ležećih policajaca na putu Banjevac - G.Breza zbog nepridržavanja brzine kretanja vozila od strane vozača čime ugrožavaju ostale učesnike u saobraćaju.

Postavio je i vijećničko pitanje koje se odnosi na kontrolu broja pasa lualica i njihovo uklanjanje sa ulica i parkova i drugih prostora općine.

Vijećnik Kadrić Memsud postavio je pitanje kad će biti nastavljene aktivnosti na izgradnji projekta planiranog na platou bivše robne kuće u Brezi.

Vijećnik Salčinović Fikret podsjetio da su u prošlom sazivu vijeća javne ustanove bile bez upravljačkih organa oko 8 mjeseci.

Zatim se pristupilo utvrđivanju dnevnog reda.

Predsjedavajući Općinskog vijeća predložio je dnevni red kao u sazivu.

Prijedlog za proširenje dnevnog reda dao je predsjednik kluba SDA, Mirza Ahmedspahić, koji je predložio da se u dnevni red uvrsti Usmena Informacija komisije o stanju na SRC „ADA“ Breza.

Vijećnik Sokić Dževahid istakao je da ukoliko Općinski načelnik u okviru svog Izvještaja ima namjeru da vijeće izvijesti o aktivnostima povodom dodjele sportsko rekreacionog centra ADA-Breza, nije potrebno proširivati dnevni rad.

Član komisije za praćenje aktivnosti ulaganja u objekat SRC „ADA“ ispred Općinskog vijeća Zaimović Anes upoznao je vijećnike da je ova komisija vršila uvid u planirane i izvršene aktivnosti ulaganja u ovaj objekat od strane općine i investitora, te da će izvještaj vijeću dostaviti na sljedećoj sjednici vijeća, a trenutno će dati usmenu informaciju o stanju objekta.

Predsjedavajući Općinskog vijeća dao je na glasanje prijedlog predsjednika kluba SDA da se u dnevni red uvrsti usmena informacija o stanju na SRC „ADA“ Breza.

Nakon provedenog postupka glasanja konstatovano je da se dopuna dnevnog reda usvaja sa 14 glasova ZA i 5 suzdržanih glasova, bez glasova protiv.

(Glasanju nije prisustvovao vijećnik Bajrić Fetah.)

Nakon toga jednoglasno sa 19 glasova ZA bez glasova suzdržanih i protiv usvojen je sljedeći dnevni red sa datom dopunom:

D N E V N I R E D

1. Usmena informacija o radu Općinskog načelnika između održanih sjednica.
2. Razmatranje Nacrta izmjena i dopuna Regulacionog plana „Centar“ Breza i Odluke o provođenju izmjena i dopuna Regulacionog plana „Centar“ Breza te donošenje zaključka o provđenju javne rasprave po istim.
3. Razmatranje i usvajanje prijedloga Odluke o pokretanju procesa strateškog planiranja- pristupanje izradi i provođenju Strategije razvoja Općine Breza (2017-2021.)
4. Razmatranje i usvajanje prijedloga Odluke o uslovima, načinu i postupku prodaje neizgrađenog gradskog građevinskog zemljišta u vlasništvu Općine Breza putem javnog nadmetanja- licitacije.
5. Razmatranje i usvajanje prijedloga Odluke o naknadama za zauzimanje javnih površina u toku trajanja privredne i kulturno- sportske manifestacije „Bazenijada 2017“.
6. Razmatranje i usvajanje Izvještaja o realizaciji Programa rada Općinskog vijeća za period od 01.01. 2017. do 30.06.2017godine.
7. Razmatranje i usvajanje Izvještaja o održanim izborima za članove savjeta mjesnih zajednica na području Općine Breza i donošenje zaključka o potvrđivanju rezultata izbora.
8. Razmatranje i usvajanje Izvještaja o provedenim aktivnostima projekta: „Stambeno zbrinjavanje Roma u Brezi –izgradnja stambenog kompleksa i unapređenje prateće komunalne infrastrukture u romskom naselju“- Faza I, sa prijedlogom zaključka.
9. Razrješenje i imenovanje člana Komisije za izbor, imenovanja i administrativne poslove.
10. Usmena Informacija o stanju na SRC „Ada“ Breza.

Ad.1

Usmena informacija Općinskog načelnika o aktivnostima između održanih sjednica.

Općinski načelnik Zaimović Munib upoznao je vijećnike da su vođene aktivnosti na izradi Izvještaja o izvršavanju Budžeta Općine Breza za prvih 6 mjeseci tekuće godine. U prvih 6 mjeseci 2017. godine ostvaren je Budžet u iznosu od oko dva miliona tristotrideset hiljada KM što je za oko 102% više od planiranih. Također je naglasio da je 350 hiljada naplaćeno od zaostalih potraživanja. Iznos od 650 hiljada su neizmirene obaveze. Tekuće redovne obaveze se redovno izmiruju. Od neizmirenih obaveza 150 hiljada ostalo je da se izmiri za poljoprivredni podsticaj za 2016. godinu.

Također se vode aktivnosti na uspostavljanju 15 infrastrukturnih projekata na području Općine Breza.

- Obezbjeđena su sredstva za završetak lokalnog puta u Župči, te sanaciju klizišta na Opreću.
- Nastaviće se i projekat harmonizacije za još 4 katastarske općine na usaglašavanja katastra i gruntovnice.
- Započet će se sanacija lokalnih puteva prema utvrđenom planu.
- Obezbijedjena su sredstva za rekonstrukciju magistralnog puta R-444 u izosu od 250 hiljada.
- Započet će i projekat uvođenja led rasvjete na području grada Breza.

- Trenutno se vode aktivnosti na ucjevljenju potoka Jasike.

Također se vode aktivnosti na realizaciji započetih i planiranih infrastrukturnih projekata.

Izvršena je i nabavka kamiona smečara za potrebe komunalnog preduzeća. Ukupna dostadašnja ulaganja na infrastrukturnim projektima iznose oko milion i 400 hiljada KM.

Upoznao je vijećnike da je Općina Breza među 11 općina u Federaciji ušla u projekat izrade Strategije jedinica lokane samouprave.

(Radu vijeća se priključili Fetah Bajrić i Jekalović Amina u 17,15 minuta.)

Ad.2

Razmatranje Nacrta izmjena i dopuna Regulacionog plana „Centar“ Breza i Odluke o provođenju izmjena i dopuna Regulacionog plana „Centar“ Breza, te donošenje zaključka o provođenju javne rasprave po istim.

Pomoćnik općinskog načelnika za prostorno uređenje, zaštitu okolice, geodetske i imovinsko pravne poslove Smajila Omerhodžić pojasnila je da se ovom odlukom utvrđuju uslovi korištenja, izgradnje, uređenja i zaštite prostora i načina provođenja izmjena i dopuna regulacionog plana Centar, a naročito granice prostorne cjeline, urbanističko-tehničkih uslova za izgradnju građevina, uslovi za uređenje građevinskog zemljišta, uređenje zelenih i slobodnih površina, te odnosi prema postojećim objektima. Provođenje plana vrši se na način i postupak utvrđen važećim zakonom o prostornom uređenju i planovima višeg reda. Svi radovi i intervencije u granicama obuhvata plana moraju biti u skladu sa istim. Istakla je da su izmjene i dopune nacrta regulacionog plana izrađene prema datim smjernicama. Predlaže da se rok za javnu raspravu odredi u roku od 30 dana s tim da se javna rasprava u Općini održi od 01.08-15.08.2017. godine, te nakon toga dostavi IPSA institutu radi unošenja eventualnih promjena.

Vijećnici Avdić Edin, Bašić Mirnes i Fetah Bajrić učestvovali su u raspravi, te su zatražili dodatna pojašnjenja koja se odnose na broj planiranih objekata u Zanatskom Centru te lokaciju istih, prijedlog za planiranje dječijeg igrališta u ovom obuhvatu, kao i mogućnost izmještanja privrednog objekta-strojna radionica.

Učesnika u raspravi više nije bilo pa je predsjedavajući općinskog vijeća predložio sljedeći:

ZAKLJUČAK

I

UTVRĐUJE SE Nacrt izmjena i dopuna Regulacionog plana „Centar“ i Odluka o provođenju izmjena i dopuna Regulacionog plana „Centar“.

II

Javnu raspravu sprovesti u periodu od 01.08.2017. do 15.08.2017. godine.

III

Javnu raspravu sprovesti u okviru vijećnika, privrednika, predstavnika mjesnih zajednica i ostalih zainteresovanih subjekata na području Općine Breza.

IV

Za realizaciju zaključka zadužuje se Služba za prostorno uređenje, zaštitu okolice, geodetske i imovinsko-pravne poslove.

V

Zaključak stupa na snagu danom donošenja i isti će se objaviti u „Službenom glasniku Općine Breza“.

Nakon provedenog postupka glasanja konstatovano je da je predloženi zaključak usvojen jednoglasno za 20 glasova ZA, bez protiv i suzdržanih glasova.
(U trenutku glasanja u sali prisutno 20 vijećnika.)

Ad. 3

Razmatranje i usvajanje prijedloga Odluke o pokretanju procesa strateškog planiranja-pristupanje izradi i provođenju Strategije razvoja Općine Breza (2017-2021.)

Pomoćnik općinskog načelnika Salih Hasanspahić pojasio je da je na osnovu Javnog poziva za podnošenje prijava jedinica lokalne samouprave u BiH za učešće u implementaciji projekta integrisanog projekta (ILDP) III, kojeg podržavaju vlada Švicarske i UNDP BiH, Općina Breza je u predviđenom roku uredno podnijela prijavu na istu, te ispunila sve uslove navedene u smjernicama za podnosica prijave.

Nakon toga uslijedilo je potpisivanje Memoranduma o razumijevanju između UNDP i Općine Breza i Protokola o saradnji između Općine Breza i Projekta integrisanog razvoja (ILDP), Općina Breza se kao partnerska općina obavezala na puno učešće u projektu IDLP III, te na uspostavljanje sistema za upravljanje lokalnim razvojem i na donošenje strategije Općine Breza za period 2017-2021. godine.

Vijećnik Avdić Edin izrazio je zadovoljstvo za ulazak u ovaj projekat. Istakao je da nam se nudi mogućnost, a ne obaveza da kao jedinica lokalne samouprave uđemo u implementaciju Projekta integrisanog lokalnog razvoja kojeg podržava Vlada Švicarske i UNDP u BiH, uz novčano učešće od 5.000 KM. Iz prijedloga se vidi da žele proširenje obuhvata lokalnih zajednica kao i povezivanje općina i kantona te stvaranje ekonomskih regija. Predviđeno je i provođenje drugih programskih aktivnosti. Postavlja se pitanje da li se usvajanjem ove odluke stavlja van snage ranije usvojena Odluka o izradi Strategije razvoja Općine Breza za razdoblje 2017.-2021. godine, te koje smo kriterije morali ispuniti da bi smo ušli u ovaj projekat. Mi kao općina ne znamo tačno razvoj kapitalnih investicija i ne znamo šta ćemo raditi u budućnosti. U svakom pogledu mi kao lokalna zajednica moramo uraditi našu strategiju razvoja i obezbijediti novčana sredstva za istu, a međunarodna zajednica će pružiti stručnu podršku kod izrade iste. Naglasio je da je općinski Budžet socijalnog karaktera i vrlo malo sredstava je predviđeno za razvojne planove. Mi moramo imati kvalitetne i dobre projekte da bi mogli dobiti sredstva Evropskih fondova, a za dobre projekte će uvijek biti sredstava.

Učešće u raspravi uzeo je i predsjedavajući Općinskog vijeća koji je pojasnio da je na 2. redovnoj sjednici usvojena Odluka o izradi Strategije razvoja Općine Breza za razdoblje 2017.-2021. godine.

Salih Hasanspahić je pojasnio da izrada strategije znači pravljenje plana aktivnosti po datim smjernicama EU. Odabrane Općine ovim procesom ulaze u međusobno takmičenje u pogledu izrade prijedloga strategije razvoja, te Općina koja bude imala najbolje prijedloge, bit će u prioritetu za dobijanje ulaska u projekat. Pojasnio je da se daje saglasnost Općinskom načelniku Općine Breza da na osnovu ove Odluke, a u skladu sa uslovima i dinamikom Projekta ILDP izvrši formiranje općinskih stručnih razvojnih timova za područja saradnje iz člana 2. Protokola o saradnji između Općine Breza i Projekta integrisanog lokalnog razvoja (ILDP) od jula 2017. godine. U skladu sa prethodnim članom, u provedbi ove Odluke posebno će se voditi računa o uključivanju relevantnih razvojnih aktera i građana u proces planiranja i izvještavanja i to predstavnika NVO, poslovnog sektora i javnih institucija i ostalih razvojnih aktera iz lokalne i šire zajednice u proces izrade lokalne razvojne strategije putem općinskog razvojnog tima, zatim o uključivanju vijećnika u procese strateškog planiranja i praćenja ostvarenja implementacije razvojne strategije putem komisija ili drugih relevantnih tijela, te u aktivnostima obuke od strane ILDP-a. Pojasnio je da se donošenjem ove Odluke stavlja van snage ranije donesena Odluka o izradi Strategije razvoja Općine Breza za razdoblje 2017.-2021. godine.

Vijećnik Kadrić Memsud istakao je važnost donošenja strategije i ulaska Općine Breza u ovaj projekat.

Vijećnik Bajrić Fetah postavio je pitanje ko će biti u timu za izradu strategije.

Općinski načelnik pojasnio je da će Općinsko vijeće može predložiti članove za izradu strategije, te se u ovaj tim mogu uključiti i vijećnici Općinskog vijeća.

Vijećnica Jekalović Amina postavila je pitanje da li će jednokratni iznos od 5.000 KM biti dovoljan za izradu ove strategije, te da li će zahtijevati povlačenje dodatnih sredstava iz Budžeta općine. Obzirom da smo ušli u drugu polovinu godine postoji li mogućnost da se donošenje strategije pomjeri od 2018.-2022. godine.

Učesnika u raspravi više nije bilo, te je nakon provedenog postupka glasanja konsatovano je da je Odluka o pokretanju procesa strateškog planiranja- pristupanje izradi i provođenju Strategije razvoja Općine Breza (2017.-2021.) usvojena jednoglasno sa 21 glas ZA, bez suzdržanih i glasova protiv.

Ad. 4.

Razmatranje i usvajanje prijedloga Odluke o uslovima, načinu i postupku prodaje neizgrađenog gradskog građevinskog zemljišta u vlasništvu Općine Breza putem javnog nadmetanja- licitacije.

Pomoćnik općinskog načelnika Smajila Omerhodžić pojasnila je da vijeće u okviru svojih nadležnosti donosi odluke o upravljanju i raspolaganju imovinom lokalne samouprave u skladu sa zakonom. Odluku o načinu i uvjetima raspolaganja nekretnine u vlasništvu Općine donosi općinsko vijeće na prijedlog načelnika općine.

Odlukom o provođenju Regulacionog plana „AUTOSOBRAĆAJ“ planirana je izgradnja poslovnog objekta – prodajni centar i parkinga za potrebe prodajnog centra na parceli kao u prijedlogu. Urbanističko-tehnički uslovi za izgradnju poslovnog objekta utvrđeni su rješenjem Službe za prostorno uređenje, zaštitu okoliša, geodetske i imovinsko pravne poslove.

Obzirom da je predmetna nekretnina u posjedu i u vlasništvu Općine Breza sa dijelom 1/1, stekli su se uslovi za prodaju iste putem javnog nadmetanja-licitacije, radi privođenja zemljišta trajnoj namjeni.

Početna prodajna cijena po kojoj će se vršiti javno nadmetanje –licitacija utvrđena je na osnovu procjene stalnog sudskog vještaka arhitektonske struke i za 1m/2 iznosi 100 ,00KM.

Vijećnik Avdić Edin zatražio je pojašnjenje o broju predviđenih parcela kao i o visini ulaganja Općine u infrastrukturno uređenje, te koliko će Općina Breza imati koristi od prodaje tog zemljišta.

Vijećnik Kadrić Memsud podržava vijećnika Avdić Edina, te traži pojašnjenje o načinu licitacije.

Pomoćnik općinskog načelnika Smajila Omerhodžić je odgovorila na postavljena pitanja, te da odluku donosi Općinsko vijeće.

Učesnika u raspravi više nije bilo, te je nakon provedenog postupka glasanja konsatovano da je Odluka o uslovima, načinu i postupku prodaje neizgrađenog gradskog građevinskog zemljišta u vlasništvu Općine Breza putem javnog nadmetanja-licitacije usvojena jednoglasno sa 21 glas ZA, bez suzdržanih i glasova protiv.

Ad. 5

Razmatranje i usvajanje prijedloga Odluke o naknadama za zauzimanje javnih površina u toku trajanja privredne i kulturno- sportske manifestacije „Bazenijada 2017“.

Pomoćnik Općinskog načelnika Salih Hasanspahić pojasnio je razloge donošenja odluke radi obavljanja djelatnosti, pružanja usluga i prezentacije proizvoda na privrednoj i kulturno-sportskoj manifestaciji i utvrđivanja visine naknade za zauzimanje javnih površina.

Vijećnik Kadrić Memsud smatra da na ovoj manifestaciji ima vrlo malo sadržaja koji promovišu i prezentiraju privredu na području Općine Breza.

Pomoćnik Općinskog načelnika za finansije Meliha Beširević pojasnila je da mi ne možemo uticati na sadržaj Bazenijade i da svako ima pravo da učestvuje i da se prijavi i da su to sadržaji koji pokazuju stvarno stanje .

Učesnika u raspravi više nije bilo, te je nakon provedenog postupka glasanja konsatovano da je Odluka o naknadama za zauzimanje javnih površina u toku trajanja privredne i kulturno- sportske manifestacije „Bazenijada 2017.“ usvojena sa 17 glasova ZA, i 4 suzdržana, bez glasova protiv.

Ad. 6

Razmatranje i usvajanje Izvještaja o realizaciji Programa rada Općinskog vijeća za period od 01.01. 2017. do 30. 06.2017. godine.

Predsjedavajući Općinskog vijeća Jusić Vedad u uvodnom dijalu istakao je da Općinsko vijeće u izvještajnom periodu održalo šest redovnih i jednu tematsku sjednicu na kojima su razmatrani propisi iz nadležnosti Općinskog vijeća. Kolegij općinskog vijeća u saradnji sa općinskim načelnikom, pomoćnicima općinskog načelnika sekretarom općinskog vijeća utvrđivali su dnevni red razmatrali problematiku koju je potrebno uvrstiti u dnevni red predviđenu Programom rada Općinskog vijeća i problematiku koja se pojavljivala na samom terenu i koju je trebalo rješavati na sjednicama Općinskog vijeća, razmatra pokrenute inicijative, te na Općinskom vijeću donosili akte kojim reguliše i provodi politiku na području općine. Općinsko vijeće je u izvještajnom periodu izvršilo blizu 80 % predviđenog plana, a procenat od 20 % nismo izvršili iz različitih razloga.

Vijećnica Škrgić Belma ispred kluba vijećnika neovisnih kandidata osvrnula se na globalnu sliku Općinskog vijeća .Istakla je da je na samom početku rada Općinskog vijeća osjetilo da su pojedini vijećnici sebe vidjeli kao važnije u odnosu na druge i sebe proglasili pozicijom, te odredili i mjesta gdje će ko sjediti. Iznijela je kritiku na način prenošenja rada vijeća putem video zapisa od strane lica koje nije kompetentno i koje iz konteksta rada vijeća u trajanju od 4 sata iznosi dijelove koje sam ocijenio da trabe prenijeti. Predlaže da se u buduću vrši prenos rada vijeća u cijelom trajanju, a da se ne prenose pojedini dijelovi. Imala je primjedbu kod formiranja stalnih radnih tijela Komisija gdje su preovladavali predstavnici vodećih stranaka. Nedopustivo je insistiranje na objavljivanju spiska lica koja su dobili socijalnu naknadu, a da nisu objavljeni spiskovi lica koji su primali daleko veće iznose među kojima ima i vijećnika. Ne postavljaju se pitanja koliko se sredstava potrošilo na objavljivanje i poništavanje konkursa za postavljanje upravljačkih struktura u JU, zbog čega se duži vremenski period postavljaju v.d. izvršioci zbog toga što se vladajuće stranke ne mogu dogovoriti, a na kraju ispaštaju građani koji nemaju kome da se obrate. Pokrenute inicijative od strane opozicionih stranaka nikada nisu uzete u razmatranje. Gorući problemi građana u prvom redu problem odlaganja otpada se ne rješava i iz mjeseca u mjesec se odlaže. Uputila je kritiku svima kao ljudima pa onda vijećnicima kada se nismo udostojili odati počast obilježavanja genocida u Srebrenici gdje se odazvao samo jedan vijećnik. Pohvalila je rad općinskog načelnika i zatražila da ne dozvoli da ljudi iz sjene utiču na vođenje politike u općini. Predlaže da se ne osvrćemo na prošlost nego da radimo za budućnost i dobrobit lokalne zajednice i građana općine.

Vijećnik Bajrić Fetah istakao je da mi kao vijećnici moramo znati nadležnosti Općinskog vijeća i o tome komentari. Mi smo na sjednici Općinskog vijeća usvojili Program obavljanja komunalnih usluga, koji se iz kojih razloga ne poštuje, pa niko iz komunalnog preduzeća nije našao za shodno da izvrši čišćenje naselja Bate kako je predviđeno usvojeno u Programu. Ko je odgovoran pa se odluke Općinskog vijeća ne poštuju. Općinsko vijeće je tu ako treba nešto dodati ili promijeniti i niko bez saglasnosti Općinskog vijeća ne može ništa mijenjati. Traži od općinskog načelnika i općinskih službi da budu odgovorni i korektni i da poštuju i izvršavaju odluke Općinskog vijeća i da na vrijeme opsluže Općinsko vijeće informacijama materijalima koje traži.

Vijećnik Avdić Edin ističe da plan i program Općinskog vijeća obuhvata sve ingerencije lokalne zajednice. Na osnovu plana i programa Općinsko vijeće usmjerava svoje aktivnosti za

rješavanje svih problema u interesu građana općine. Rezultat toga rada je donošenje kvalitetnih odluka, rješenja, drugih akata. Važno je da svi akte proizašli iz rada Općinskog vijeća budu izvršeni i realizovani.

Predlaže:

- traženje odgovornosti od stručnih službi i nosiaca stručnih službi, a ne da nam pričaju šta su radili nego šta je urađeno.
- razmatranje vijećničkih pitanja i inicijativa od strane kolegija Općinskog vijeća koje nisu realizirane, zašto i to kvartalno preko svojih predsjedničkih klubova (inicijative: rješavanje pasa lotalica, estencijalna lista lijekova koja je štetna za građane, uklanjanje animalnog otpada, pripremanje informacija za zimsko održavanje i postavljanje horizontalne signalizacije), a što je regulisano Poslovnikom o radu Općinskog vijeća.

Vijećnik Kadrić Memsud podržava diskusiju vijećnika Avdić Edina.

Safet Zahirović ispred Stručne službe Vijeća istakao je da Vijeće u svom radu mora poštovati Statut, Poslovnik i Etički kodeks. Takođe se mora pridržavati i dostignutih standarda koje je Vijeće postiglo u svom radu u saradnji sa misijom OSCE u BiH.

Predsjednik Etičkog odbora Hajduković Mirsad istakao je da se vijećnici u svom radu moraju pridržavati Statuta i Poslovnika o radu Općinskog vijeća kao i Etičkog kodeksa. Istakao je da vijećnici u svom radu moraju djelovati isključivo u društvenom, a ne u ličnom interesu i da u međusobnoj komunikaciji uvažavaju i poštuju jedni druge, bez obzira na vjersku, spolnu i stranačku pripadnost. Uočeno je da vijećnici u dosadašnjem radu krše pravila propisana Etičkim kodeksom. To kršenje se ogleda što se pojedini vijećnici ponašaju arogantno, nekorektno i nedolično prema drugim vijećnicima i učesnicima u radu. Često se čuju dobacivanja, podsmjehivanja i podrugljiv ton. Također je primjećeno da neki vijećnici u svom obraćanju za govornicom skreću sa teme dnevnog reda što nervira ostale, a sam predsjedavajući ne kontroliše i ne reaguje na ovakvo ponašanje. Nekorektno je od strane vijećnika što izostaju i ne odazivaju se na javne manifestacije iako su uredno i blagovremeno pozvani. Skrenuo je pažnju na prikladno odijevanje vijećnika.

Vijećnik Avdić Edin istakao je da se mi moramo baviti suštinom, a ne formom. Mora se imati u vidu da je parlament, skupština, općinsko vijeće ustvari verbalna arena gdje se odvija monolog, dijalog i bude tu i sukoba mišljenja, daju se inicijative, sugestije, ali sve to mora biti u granicama demokratskog ponašanja. Podsjetio je da vijeće u dosadašnjem radu ostvarilo dosta toga i mimo usvojenog Programa rada vijeća. Također je rad predsjedavajućeg Općinskog vijeća ocijenio sa najvećom ocjenom i da je ušao u psihologiju vijećnika. Zatražio je od vijećnika da se pridržavaju člana 15. Etičkog kodeksa i da ga dobro prouče. Diskutabilno je to šta se to smatra nedoličnim ponašanje te ističe da Vijeće dobro radi kao i sam predsjedavajući Općinskog vijeća, što se vidi i po donešenim aktima.

Vijećnik Bajrić Fetah ističe da smo mi svi različitog temperamenta i različito reagujemo. Odgovorno tvrdi da je u prošlom sazivu neko upravljao radom vijeća, te da je bilo da se sjednice održavaju bez vijećnika jedne političke partije, gdje je dolazilo do kršenja zakona i procedura. Traženjem od općinske službe da izvršavaju i pripremaju odluke donesene od strane Općinskog vijeća, nije nametanje i upravljanje općinskim službama, što se stavlja na teret. Predlaže da se prilikom obrazlaganja i rasprave ne daju paušalne ocjene i da ako ima neko nešto da kaže tj. da kaže imenom i prezimenom, te da se svi moramo međusobno uvažavati.

Vijećnik Buljetović Čamil daje podršku radu Etičkog odbora, te da je njihov izvještaj objektivn i realan pristup i pregled rada Općinskog vijeća.

Vijećnik Sirotanović Arif daje podršku radu Etičkog odbora.

Učesnika u raspravi nie bilo, te je nakon provedenog postupka glasanja konstatovano da je Izvještaj o realizaciji Programa rada Općinskog vijeća za period od 01.01. 2017. do 30. 06.2017. godine usvojen jednoglasno sa 21 glasom ZA, bez protiv i suzdržanih glasova.

Ad. 7

Razmatranje i usvajanje Izvještaja o održanim izborima za članove savjeta mjesnih zajednica na području Općine Breza i donošenje zaključka o potvrđivanju rezultata izbora.

Predsjednik komisije za sprovođenje izbora za članove savjeta mjesnih zajednica Safet Zahirović upoznaje vijećnike o toku i postupku i rezultatima provedenih izbora. Upoznao je vijećnike da se izbori u mjesnoj zajednici Prhinje i Založje moraju ponoviti zbog podnešenih prigovora. Istakao je da mjesnu zajednicu kao instituciju moramo dignuti na veći nivo obzirom da je mjesna zajednica baza odakle sve počinje i da su provedeni izbori rezultat stvarnog stanja u mjesnim zajednicama.

Vijećnik Arif Sirotanović na osnovu odziva birača predlaže da se izbori u mjesnoj zajednici Breza 1,2 i 3 obnove zbog slabog odziva birača.

Vijećnik Suljagić Mirzet pohvalio je rad Komisije te istakao da je komisija uradila onako kako je mogla i da rezultati pokazuju stvarno stanje i ne zainteresovanost građana. Da bi se poboljšalo postojeće stanje u mjesnim zajednicama predlaže da se u budžetu predvide sredstva za naknade za rad predsjednika mjesnih zajednica. Ukoliko neke mjesne zajednice smatraju da je prekršena izborna procedura imaju mogućnost da ponove izbore, ali o svom trošku. Također je istakao da bi trebalo izvršiti pregrupisanje mjesnih zajednica obzirom da neke mjesne zajednice po broju stanovnika ne mogu imati status mjesne zajednice.

Vijećnik Buljetović Čamil ističe da je mjesna zajednica osnovna ćelija društva i lokalne zajednice i postavlja se pitanje zašto je odziv birača slab. Smatra da su građani izgubili povjerenje u izbore i institucije vlasti jer su se često radili dirigovani izbori. Drugo što pada u oči je jednonacionalni sastav i bez prijedloga drugih naroda. Treba tražiti izlaz i uzrok ovakvog stanja ne zainteresovanosti za mjesne organe kao osnovne ćelije društva.

Vijećnik Bajrić Fetah je pojasnio da mjesnu zajednicu Breza ne čini samo grad Breza 1 i 2 nego i ostale podružnice u kojima je izlaznost bila zadovoljavajuća.

Safet Zahirović je dao pojašnjenje tačke 2. predloženog zaključka koja se odnosi na peticiju građana naseljenih mjesta Prhinje i Založje, te prijedloga da se izborni proces u tim mjesnim zajednicama ponovi. Također je pojasnio da će služba za privredu izvršiti implementaciju tačke 1. predloženog zaključka.

Vijećnik Sokić Dževahid ukazao je na tehničku grešku tačke 2. zaključka.

Vijećnik Arif Sirotanović predlaže da se za tačke 1 i 2 predloženog zaključka glasa pojedinačno što nakon provedenog postupka glasanja Vijeće nije prihvatilo.

Nakon toga predsjedavajući općinskog vijeća predložio je sljedeći:

ZAKLJUČAK**I**

DAJE SE SAGLASNOST na Izvještaj o održavanju izbora za članove savjeta mjesnih zajednica na području Općine Breza, koji su održani dana 01. jula 2017. godine.

II

U naseljenim mjestima Prhinje i Založje ponoviti izborni proces do naredne sjednice Općinskog vijeća.

III

Za realizaciju tačke I. Zaključka zadužuje se Služba za privredu, a realizaciju tačke II. zadužuje se Služba za privredu i Komisija za provođenje izbora za članove savjeta mjesnih zajednica.

IV

Zaključak objaviti u u Službenom glasniku Općine Breza.

Nakon provedenog postupka glasanja konstatovano je da se predloženi zaključak usvaja sa 17 glasova ZA i 4 suzdržana glasa bez glasova protiv.

Ad. 8

Razmatranje i usvajanje Izvještaja o provedenim aktivnostima projekta „Stambeno zbrinjavanje Roma u Brezi–izgradnja stambenog kompleksa i unapređenje prateće komunalne infrastrukture u romskom naselju“- Faza I, sa prijedlogom zaključka.

Pomoćnik Općinskog načelnika Salih Hasanspahić upoznao je vijećnike da je u skladu sa javnim pozivom Ministarstva za ljudska prava i izbjeglice Općina Breza pravovremeno dana 09.09.2013. godine podnijela projektni prijedlog pod nazivom „Stambeno zbrinjavanje Roma u Brezi–izgradnja stambenog kompleksa i unapređenje prateće komunalne infrastrukture u romskom naselju“- Faza I. Ukupna vrijednost projekta je 310.37.93 KM, a traženi iznos od Ministarstva je 199,294,04 KM.

Komisija za odabir prioritetnih projekata iz oblasti stambenog zbrinjavanja Roma u BiH, Općini Breza dodijelila u potpunosti traženi iznos od 199,284,04 KM uz učešće općine od 111,243,89 KM, koji se ogledaju kroz troškove otkupa zemljišta na kome se planira izgradnja objekata, troškovi izrade projektne dokumentacije, troškovi ucjevljenja potoka u romskom naselju (unapređenje komunalne infrastrukture). Na osnovu navedene odluke, te potpisanog memoranduma o razumjevanju, potpisan je i ugovor o prijenosu sredstava.

Mišljenje Službe za finansije, inspekcijske poslove i opću upravu od 07.07.2017. godine grant sredstva u traženom iznosu obezbijedit će se iz redovnih poreznih prihoda Općine Breza.

Vijećnik Bajrić Fetah istakao je da su grant sredstva u iznosu od 199,284,04 KM utrošena ne namjenski za tekuće potrebe. Ko je i na što potrošio, ko je odgovoran za utrošena sredstva. Traži da se pojasni mišljenje Općinskog pravobranioca o prijedlogu Ugovora o saradnji koji se namjerava zaključiti između Općine Breza kao korisnika sredstava i Ministarstva za ljudska prava i izbjeglice BiH.

Pomoćnik Općinskog načelnika Meliha Beširević pojasnila je da su grant sredstva u iznosu od 199,294,04 KM na osnovu Odluka o pozajmici donesenih od strane Općinskog načelnika od 15.08 i 10.01.2014. godine u cjelosti potrošena na redovne tekuće izdatke Općine. Sredstva za nastavak realizacije I faze navedenog projekta u iznosu od 199.294.04 bit će obezbijeđen iz redovnih poreznih prihoda Općine Breza.

Vijećnik Kadrić Memsud predlaže da damo podršku u obezbjeđivanju pomenutih sredstava da bi se započeti projekat i nastavio.

Vijećnik Avdić Edin slaže se da se treba naći rješenje u obezbjeđivanju sredstava, ali isto tako šef finansija se ne smije dovesti u sivu zonu i trebao je pismenim putem upozoriti Općinskog načelnika da se radi o nemjenskim sredstvima i da se trebala zatražiti saglasnost Općinskog vijeća.

Učesnika u raspravi više nije bilo, te je nakon provedenog postupka glasanja konstatovano da je sa 14 glasova ZA i 5 suzdržanih glasova usvojen Izvještaja o provedenim aktivnostima projekta „Stambeno zbrinjavanje Roma u Brezi –izgradnja stambenog kompleksa i unapređenje prateće komunalne infrastrukture u romskom naselju“- Faza I, sa prijedlogom zaključka:

ZAKLJUČAK**Član 1.**

Ministarstvo za ljudska prava i izbjeglice BiH, kao donator, i Općina Breza, kao implementator, dana 11.12.2013. godine, zaključili su Memorandum o razumjevanju na realizaciji projekta „Stambenog zbrinjavanja Roma u Bosni i Hercegovini u 2013. godini“ broj: 01-39-4654/13, kojim je Općina Breza preuzela obaveze i odgovornosti u vezi sa implementiranjem navedenog projekta i obavezala se da će se sredstva po ovom Memorandumu koristiti isključivo u namjenu realizacije projekta stambenog zbrinjavanja Roma te da će utrošak sredstava biti transparentan, ekonomičan, efikasan i u skladu sa važećim zakonskim procedurama.

Član 2.

Na osnovu Memoranduma iz tačke 1. ovog zaključka zaključen je Ugovor o prijenosu sredstava za projekte „Stambenog zbrinjavanja Roma u Bosni i Hercegovini u 2013. godini“, broj 01/2-05-3376/13 od 11. decembra 2013 godine, na osnovu kojeg su Ministarstvo za ljudska prava i izbjeglice BiH i Federalno ministarstvo prostornog uređenja obezbjedili i uplatili na račun Općine Breza namjenska grant novčana sredstva u iznosu od 199.294,04 KM, a Općina Breza se obavezala da će osigurati sufinansirajuća sredstva u iznosu od 111.243,89 KM. Ukupna vrijednost I faze Projekta iznosi 310.537,93 KM.

Općina Breza prihvatila je doznačena grant novčana sredstva i obavezala se da će ista utrošiti isključivo za realizaciju I Faze projekta izgradnje stambenog kompleksa/zgrade od 25 stambenih jedinica za romske porodice sa prebivalištem na području Općine Breza.

Član 3.

Prema podacima Službe za finansije, inspekcijske poslove opću upravu Općine Breza, iznesenim u mišljenju, broj: 03/1-14-2038/17 od 07.07.2017. godine, dodijeljena grant novčana sredstva iz člana 2. ovog Zaključka su na osnovu Odluke o pozajmici, broj: 01/2-14-2139/14 od 15.08.2014. godine i Odluke o pozajmici, od 10.01.2014. godine, koje je donio Općinski načelnik Breza, u cjelosti potrošena na redovne tekuće izdatke Općine Breza.

Član 4.

Daje se saglasnost Općinskom načelniku Breza da nastavi sa realizacijom Projekta Stambeno zbrinjavanje Roma u Brezi: „Izgradnja stambenog kompleksa i unaprjeđenje prateće komunalne infrastrukture u romskom naselju.“- I FAZA PROJEKTA i s tim u vezi potpiše Ugovor o saradnji sa Ministarstvom za ljudska prava i izbjeglice BiH, koji je sastavni dio ovog Zaključka.

Član 5.

Sredstva za nastavak realizacije I faze navedenog projekta u iznosu od 199.294,04 KM, prema Mišljenju Službe za finansije, inspekcijske poslove i opću upravu, broj: 03/1-14-2038/17 od 07.07.2017. godine, koje je sastavio dio ovog zaključka, obezbjedit će se iz redovnih poreznih prihoda Općine Breza.

Ugovorom iz člana 4. ovog Zaključka, Općina Breza će se obavezati da dodijeljena grant novčana sredstva za stambeno zbrinjavanje Roma na području Općine Breza u iznos od 199.294,05 KM utroši na izgradnju tri stambene jedinice i zajednički prostor sa rokom realizacije 30.06.2018.godine.

U slučaju da dodijeljeni grant ne bude utrošen u skladu sa projektnom dokumentacijom i Ugovorom o saradnji, isti će biti vraćen Ministarstvu za ljudska prava i izbjeglice u roku od 10 (deset) dana (član 7. predmetnog Ugovora o saradnji).

Član 6.

Ovaj Zaključak stupa na snagu danom donošenja a objavit će se u „Službenom glasniku Općine Breza“.

Ad 9.

Razrješenje i imenovanje člana Komisije za izbor, imenovanja i administrativne poslove.

Predsjednik Komisije za izbor, imenovanja i administrativne poslove na sastanku održanom 18.07.2017. godine prihvatila je ostavku vijećnika Muratović Namika u članstvo u Komisiji za izbor, imenovanja i administrativne poslove, te za novog člana predlaže Bulbulušić Nejiru.

Učesnika u raspravi više nije bilo te je vijeće sa 17 glasova ZA i 5 suzdržanih glasova prihvatilo prijedlog da se u komisiju imenuje Bulbulušić Nejira.

Ad 10.

Usmena informacija o stanju na SRC „Ada“ Breza.

Član Komisije za praćenje ulaganja u objekat SRC „ADA“ Bajrić Fetah upoznao je vijećnike da je komisija započela uvid i pregled dokumentacije o iznosu i načinu ulaganja u objekat od strane Općine Breza i firme EKO KRUG Breza kao investitora. Još uvijek komisija nema zvaničan iznos ulaganja što je u toku.

Općina Breza izvršila je predračun radova šta bi trebalo uraditi i trenutno stanje objekta. Firma EKO KRUG Breza napravila je dinamiku ulaganja u objekat. Zadatak komisije je uvid koliko i ko je uložio sredstava, a sva druga pitanja treba dati nadležna služba.

Vijećnik Kadrić Memsud istakao je da nedostaju cifre informacije i da još uvijek ne znamo šta je i koliko je ko uložio u objekat, te zašto je došlo do jednostranog napuštanja bazena.

Vijećnik Avdić Edin daje podršku komisiji i kako se desilo da je investitor pušten u posjed objekta bez odluke Općinskog vijeća.

Općinski načelnik Munib Zamović pojasnio je da u pogledu pravne regulative općina pokrivena i u svakom slučaju može zaštititi svoja prava.

Vijećnik Buljetović Čamil istakao je da poznaje investitora te da je došao do saznanja da je investitor dobio prijeteće poruke, te je zbog toga prekinuo potpisani ugovor.

Vijećnik Sokić Dževahid postavio je pitanje kakav je trenutni status ovog objekta.

Općinski načelnik pojasnio je da je od strane općinskog pravobranioca pokrenut postupak za raskid ugovora.

Na kraju rada sjednice, vijećnici su se izjasnili i složili da se u mjesecu augustu održi redovna sjednica Općinskog vijeća.

Ovim je iscrpljen dnevni red osme redovne sjednice Općinskog vijeća Breza, koja je sa radom završila u 21.00 sati.

Sastavni dio ovog zapisnika čini i tonski zapis sjednice.

ZAPISNIK SAČINILA
Zakira Smailbegović

PREDSJEDAVAJUĆI
Općinskog vijeća
Jusić Vedad